

Uz te uvjete se i prošle godine povećala visina prosječnih troškova obrade i prerade 1 litre mlijeka. Ti su troškovi iznosili u prosjeku 28,95 d/l, što predstavlja povišenje za 25,8% u usporedbi s god. 1963. U mljekarama su se troškovi obrade i prerade kretali između 18,5 i 40,7 d/l. Uzrok tolikom odstupanju zavisio je o usmjerenosti proizvodnje, zaposlenosti radne snage i opsegu otkupa mlijeka. Kod pasterizacije mlijeka (u bocama) troškovi su se kretali između 20—32 d/l, a kod prerađenog mlijeka od 20—40 d/l.

U mljekarama 1 litra otkupljenog mlijeka u obrađenom i prerađenom stanju u prosjeku je bila unovčena s 86,51 d, što znači da je vrijednost mlijeka 66,5% od ukupnih troškova prerade.

Čestitamo 70. rođendan prof. dr Nikoli Zdanovskom



Dr. Nikola Zdanovski je rođen u Moskvi god. 1895. Diplomirao je na Poljoprivredno šumarskom fakultetu u Zagrebu 1926, a doktorirao 1936. iz oblasti stočarstva. Službovao je na Poljoprivrednom dobru »Božjakovina«, a zatim radio 10 godina kao upravnik planinskog dobra Mrzle Vodice. U periodu od 1941. do 1944. aktivno saraduje s NOP-om, a od 1944. po nalogu odlazi na oslobođeni teritorij ZAVNOH kao organizator stručne nastave. Poslije rata, šef je Odsjeka za stočarstvo u Ministarstvu poljoprivrede i šumarstva NR Hrvatske, zatim upravnik Instituta za stočarstvo NRH, od god. 1946. predstojnik Zavoda za mljekarstvo i planinsko gospodarstvo na Poljoprivredno šumarskom fakultetu u Zagrebu, na kojem je i habilitirao iz mljekarstva, a god. 1947. prelazi u Sarajevo za redovnog profesora planinskog gazdovanja i mljekarstva, gdje se i danas nalazi.

7. aprila o. g. navršava redovni univerzitetski profesor dr Nikola Zdanovski 70 godina života i četrdeset godina rada u mljekarstvu i stočarstvu.

Katedra za stočarstvo Poljoprivrednog fakulteta u Sarajevu želi i na ovaj način da oda priznanje svome dragom profesoru i dugogodišnjem rukovodiocu.

Životni put Nikole Zdanovskog prožet je radom na naučnoistraživačkom polju, stručnom polju, pedagoškom radu sa studentima i mladim stručnjacima, kao i organizacijom podizanja naučnih institucija u Zagrebu i Sarajevu.

Opus naučnoistraživačkog rada prof. Zdanovskog obuhvaća 136 naučnih, stručnih i drugih publikacija iz oblasti stočarstva, planinskog gazdovanja i mljekarstva. Međutim, centralna djelatnost tog zasluženog radnika predstavljena je radovima iz ovčjeg mljekarstva, koji po svome karakteru predstavljaju cjelinu, jedinstvenu po načinu ispitivanja, interpretaciji i dubini naučne misli.

Svojim naučnim ispitivanjima i metodikom rada u ovoj oblasti, prof. Zdanovski je oformio školu svojih sljedbenika među mlađim mljekarskim kadrovima u cijeloj zemlji. Osnovna karakteristika ove škole je da pronalazi autohtone mlječne proizvode, obrađuje ih naučnim postupkom, ističe ono što je pozitivno i daje prijedlog za usavršavanje tehnologije proizvodnje u svrhu standardizacije.

Od osnivanja Poljoprivrednog fakulteta u Sarajevu, čiji je matičar, prof. Zdanovski je pored nastavnčke dužnosti, obavljao i obavlja niz funkcija, dajući tako pun doprinos funkcioniranju i razvijanju ove ustanove. Bio je do sada 3 puta dekan fakulteta, jedan put prodekan, a od osnivanja katedre za stočarstvo on je njen prvi i stalni rukovodilac. Odgovorni je urednik »Radova« Poljoprivrednog fakulteta u Sarajevu, te član niza fakultetskih komisija.

Od osnivanja Naučnog društva BiH profesor Zdanovski je njegov stalni član, gdje vrši povremeno dužnost sekretara Odjeljenja za privredno-tehničke nauke i dužnost sekretara društva u cjelini.

Formiranjem sekcije Udruženja univerzitetskih nastavnika i naučnih radnika u Sarajevu, postaje prvi predsjednik Sekcije. Prof. Zdanovski vrši povremeno i dužnosti člana fakultetskog i univerzitetskog Savjeta. God. 1961. izabran je za predsjednika Jugoslavenskog društva za proučavanje i unapređenje mljekarstva. Na toj dužnosti nalazi se i danas, kao jedini redovni profesor mljekarstva na jugoslavenskim univerzitetima.

God. 1963. u čast Dana ustanka naroda BiH, Izvršno vijeće SR BiH dodijelilo je profesoru Nikoli Zdanovskom 27-julsku nagradu za dugogodišnji i samoprijegorni rad.

Članovi stočarske katedre Poljoprivrednog fakulteta u Sarajevu žele, i ovom prilikom, svome dragom profesoru i drugu još puno godina plodnog i uspješnog rada.

*Kolektiv Katedre za stočarstvo
Poljoprivrednog fakulteta u Sarajevu*

Sa svoje strane ovo Uredništvo se priključuje čestitci sa željom da nam prof. dr Nikola Zdanovski kao dugogodišnji član redakcionog odbora i suradnik u časopisu »MLJEKARSTVO« još dugo poživi.

OBAVIJEST

Iz tehničkih razloga u ovom broju izostale su rubrike »Vijesti«, »Tržište i cijene« te »Iz domaće i strane štampe«, pa molimo čitaoce da to uvažavaju.

Uredništvo